



**ATASSUT**

**UPA14/131-1**

**Knud Kristiansen**

**01.04.2014**

**Kalaallit Nunaanni nunat allamiut pillugit inatsisip allannguutissaata atuutilernissaanut aalajangersagaliornissaq pillugu Inatsisartut aalajangernissaat pillugu siunnersuummut oqaaseqaateqarnissaq (nunamut isernissamut malittarisassat ataatsimoorussat allassimangitsut (isernissamut malittarisassat) pillugit peqqussummik pilersitsinissaq, paasisassarsiorluni suliaqarnerit assigisaallu pillugit maleruagassanik aalajangersaanissamut pisinnaatitaaffigiliinissaq.**

(Inuussutissarsiornermut Aatsitassanullu Naalakkersuisoq)

ATASSUT-miit allannguutissatut siunnersuut, pissusissamisoortutut isigaarput. Qallunaat nunaata uani nunatsinni nunat killeqarfiini nakkutilliineq eqqarsaatigalugu Schengen-mut isumaqatigiisummut naammassinnittunngortitsinissaa anguniarlugu killeqarfinni nakkutilliinerit eqaallisarniarneqarput, taamatullu nunamut iserniarnermi isumaqatigiisummut naapertuuttumik ilumut iserniartut naammassinnissimanersut inuttut paasissutissanik sukumiisumik suliaqartoqarsinnaanissaa tunngavissinniarneqarpoq.

ATASSUT-miit pingaartipparput, ukiut siuliini Schengen-mi isumaqatigiisut aallaavigalugu nunat killeqarfiini qasunganerusumik periuseqarluni isersinnaalernerq kinguneqarnikuugaluartoq, taamaattoq isumannaallisaaneq upalungaarsimanerlu eqqarsaatigalugit, tunngaviusumik nunamut iserniartut siornatigut isernissamut itigartitaasimanginnissaat, imaluunniit nunamut isersinnaanermut akuersissummik arsaagaasimanginnersut, allatigulluunniit pissuteqartumik itigartitaasimanginnersut paasiniallugit paasissutissanik aallertarnermi atuutsitsilernissaq pingaaruteqartutut isigaarput. Tamannalu uani tunngavissinniarneqarmat naapertuuttutut isigaarput.

Kiisalu naggataatigut, ilaatigut uunga attuumassuteqarsinnaammat, ATASSUT-miit Naalakkersuisunut apeqqutigissavarput (allakkatigut aamma akineqassagutta iluarissavarput), pingaartumik aasaanerani angallatit nunanit allaneersut, tingerlaatillit, allallu assigisaat pingaartumik sinerissami sumiiffimmiit sumiiffimmut “takornarissat” namminneq angalaartut,



## ATASSUT INATSISARTUNI

---

amerlasuutigullu kangerlutsinni angalaartartut qanoq nakkutigineqartigineri paaserusunnarmat, aammalu ilumut assigiinngitsutigut unioqquitsillutik annissuisannginnersut qularnaarneqartarnersoq, soorlu mannissarlutik, ujaqqanik assigisaannillu annissuinnginnersut qanoq qularnaarneqartarnersoq? Tassami malunnartumik amerliartorput taamatut pingaartumik aasaanerani sinerissami angalaartartut, nunattalu ilisimaneqaraluttuinnarnerani ikiliartorunnaratik.

Taamaattumillu ATASSUT-miit tamanna aamma qularnaatsumik iliuuseqarfigineqarnissaa kaammattuutigissavarput.

Taamatut oqaaseqarluta siunnersuut akueralugu, innersuussutigissavarput ataatsimiititaliami susassaqartumi aappassaaneerneqartinnagu suliarineqassasoq.